

GUILTS NE PXEEL¹ PABL LO ZHA FILIP

¡Diuzh to grëse to!

¹ Naa nac Pabl, grop no Timoté laa no rxee^l guits rii guiedz Filip i. Laaw ziaad lo to ne nac to zha ne ngable lo Dios, ni nacnie to Jesús; zigtaa tow, zigtaa zha ne zo lo tow, zigtagaa zha ne run^u xyudar zhow. Nan^le to gan^le zigtaa naaw, zigtaa Timotéw, tib ngundziin nac no lo Jesús.

² Dios men^u ne nac Pxoz ne, ni Jesús men^u ndzon ne rnabey, me glu gan^le pa lotaa noxco me to, zee^una ni tib zhgab ctsebde to.

³ Zee^une rsoladztaa naa to, rded naa xquizh lo Dios; ⁴ ni zee^une rzodiidznie naa me, rley naa go^u rnab naa lo me gacnien^u me to; ⁵ sac desde dze ne laa to psilo bliladz Jesús haxta lo nadze, tibaque laa to quiayacnie naa, quiayun^u to xyudar naa noseed naa miech Xtiidz Ndzon me. ⁶ Ni nan^lpa naa, zigne squi psilo Dios nozhixcuaa me lo xquiel^umban to, zigse zie dze laa me gzhixcuaaraa to, zee^una nsinle zo to gal^u dze ne laa Jesús guiaad stib.

⁷ Mi^u co racladz naa, ni ib rieguiala sac ne nligaa rleynie naa to. Sac ib rsaande to naa, zigtaa zee^uznu no naa ladzguiiba, zee^une zonlaagaa naaw, zatne racpaa rne naa ni rlu naa gan^le ne nli diidzli nac Xtiidz Jesús. ⁸ Dios nan^u gan^le pa lotaa nonie to guic naa, rquianë zdoo naa to, zigne rzacaque Jesús ne.

9 Rnab naa lo Dios gacnieñ me to, zig zie dze gleyniera to samiech to, tsabiiniraa to, **10** zeeña guien to cue to niapse grë ncuaane ndzinli gun to. Sca iñe ndzinli nac lo xquielmban to, ni tib xtol to guien gal dze ne guiaad Jesùs; **11** zaacse gban to. Ga glu to gañle lëë miñ co blu Jesùs lo to, zeeña sca csanglaa to Dios.

12 Bets, bzian, racladz naa gacnañ to gañle niicle tel pe nactaa ncuaane nodeed naa, per led miñcod gon cuëz ygaazdraa Xtiidz Ndzon Jesùs, sinque lel znu mazdraa ndal miech ne noquiaadiaga. **13** Sac tel niina, zigtaa grë zha ne rquia dziin lo gobierna, ni grëragaa miecha, laa zho nañle gañle ne loxaque noyuñ naa xtsiñ Jesùs gane znu no naa ladzguiib. **14** Sac ndal grë bets zeeñe gon zho laa naa znu biab ladzguiib, laa zho bguiaalraa laa zho noseed miech Diidz Ndzon rii; peet rtoladzdraa zho, peet dzeb guien draa lo zho, masaque Dios rnalo zho.

15 Parga nli no stib dii zha ne psilo noyuñ dziin co, per laa zho noyuña loxaque par dien zha guiañzíuu zho, sac në rac zdoo zho ran zho zha none naa Xtiidz me. Per zigne no zha ne sca nac, noque zha ne nli dib zdoo zho quiaseed zho miech. **16-17** Lëë zha co nagon rlu ne nli rleynie zho naa; sac nañ zho ib laa Dios bzo naa gne naa ni glu naa lo miech gañle ne nli diidzli nac Xtiidz Jesùs; laa zha ne sca noyuñ dziin co par guianzíuu zho, rzac zho na tel mazdraa glaa guiaañ zho lo naa, mazdraa lozh coguielñë zho naa ne laa naa znule no ladzguiib. **18** Per par naa, pex gun naa zho. Tel zha ne zie dib zdoot, zha ne zieedgaa dib zdoot, totsaque ne Xtiidz Jesùs quiaseed zho miech; miñ

co nac miñe mazdraaa rley naa.

¹⁹ Ni zleyragaa naa, sac nañ naa ib zrie naa zaatne nioogyu naa nu; sac lala quianab to lo Dios por naa, ni lala nacnie zhiEspíritu Jesús naa. ²⁰ Dib zdoo naa racladz naa, tiblique gac naa léeb naa gañ naa miñe tedtaa naa, gdziñd dze ne guñ naa ncuaañe cuee xquielto naa. Racladz naa cxobnenñ naa ganle zha meñ rotaa nac Jesús; niicle telñ niaca por miñ co yquiaaqui gut miech naa. ²¹ Sac gonñ, par naa laa naa mban par guñ naa miñe rnabey Jesús, ni zeeñe guetgaa naa, nañpaa naa tib guielbley nroob ne ygaa naa. ²² Per telñ laga mban naa, nzianraa ncuaañe grieelo guñ naa lo me; dzigo nagoñ riendaque naa dien pa miñ wenraa. ¡Pe wena gbanraa naa, te wena ye prontga gbi naa lo guidzliu rii! ²³ No hor rzaac naa gbanraa naa, nogaa hor rzaac naa tebaa laa naa wwhile lo guidzliu rii; zeeña ziagaa naa lo Jesús, sac nligaa zoot naa laa naa bdzinle lo me. ¡Miñ co mazdraaa wen, lédle cuñz naa lo guidzliu rii! ²⁴ Per rienñ naa ible none cuñz naa, sac rquiinpaa to naa. ²⁵ Miñcocxe nagoñ waa, rgobey naa zbanraa naa, zeeña lozh cseed naa to choobraa to lo Xtiidz Jesús, inñe nley gac to laa to rliladza; ²⁶ ni zeeñe laa naa gbire guialo to i, rienñ naa nroob gley to, zdeed to xquizh lo Jesús porne racnienñ me naa.

²⁷ Per miñe rsopaa naa diidz lo to gonñ: Goltsoxco golban zigne no gban zha ne ngab xnéz Jesús, zeeña niicle telñne grieelod guialo naa, racladz naa gon naa tipse nac to gré to, tiblique dziits zo to lo Xtiidz Dios; ni noxco to dieñ zha gliladz gréraa miech Jesús, ²⁸ ni lalnu rdziebde to gré zha ne rléeb ranñ to.

Ga guien zho ganle nëz ne nitlo zho zie zho, sangue to ga rlu ne laa Dios psilaale to lo xtol to, ni nacnie me to. ²⁹ Sac gon, ible none gan to guielnë porne no to xnëz me, bzooblod Jesùs to loxaque par ygaa to guielnzaac qui gnalo to me. ³⁰ Niicle tow, niicle naagaaw none dzian ne miñ co. Gonle to ganle zha nactaa grë ncuaane bdeed naa, ni ziyoungaa to grë miñe nodeed naa niina.

2

Goc Jesùs tib men ndooladz

¹ Nanle to ganle Jesùs rchoobladz zdoo to, me rlu zha gleynie to samiech to, tipse nac to ni Espíritu Sant nacnie to; nanle to ganle none yquia zdoo to samiech to. ² Gacxe nana sca, golconley zdoo naa, iné tipse golgac, golleynie grë zha ne nacgrë to, tipse golnee, ni tipse golgac tel pa lo dziin ne gnediïdz to gun to. ³ Ncuaane gun to, guabde to ne laa to guna par dien zha csanwin to stib miech, zeen dien zha guiañziuu to; sinque iné ndooladz golgac, masaque goltsernie guic ne nonraa stib miech lo to. ⁴ Ib yguibde to ne lose to yquiin ncuaane gun to, sinque golguib dien zha gun to xyudar grëraa miech.

⁵ Golsoladz ganle pa lotaa ndooladz goc Jesùs len dze ne biaadted me lo guidzliu, scaquegaa nasca ndooladz golgac. ⁶ Sac tel me:

Niicle ne Dios nac me,
per led miñcod niab me nrieed me lo guielndzon ne
no me,

⁷ sinque grëse zigne nac me, laa me psaña tib lad,
laa me goc zig tib ngundziin win,
biaad me gol me lo guidzliu rii goc me miech.

Nacle me miech,

⁸ ni bii psaŋwin me me lo miech,

haxta bdeed me diidz pquiaa zho me lo cruz,

zig run zho cho grë zha yozh.

⁹ Miŋcocxe waa, psaŋglaaraa Dios me,

biaan me men ne mazdraa non, men ne mazdraa
nroob;

¹⁰ zeeŋa zeeŋe laa me gaquiet,

grëse zha ne no gbaa, grëse zha ne no lo guidzliu,

ni grëse zha ne no nëz len guidzliu, laa zho yquiits-
gzhib,

¹¹ ni grëse zho laa zho cueero, guiab zho ganle ne
nli me nac men ne rnabey.

Ga laa zho cxobneŋ ganle, zha men nroobtaa nac
Dios, men ne nac Pxoz me.

Zha ne nac biini lo guidzliu rii

¹² Bets, bzian, ne nligaa rleynie naa to. Laa naa
rnab lo to (zigne bioxco to bin to xtidz naa zeeŋe
blëz naa lo to i, scaqueegaa niina niicle ne zit zo naa,
golgon miŋe rne naa nu), ib gdeete to diidz guiab
to ladznia dol stib, niina ne laa Dios psilaale to;
golguien tsieniewquite guic to. ¹³ Benque Dioszhal
rsiaab guic to rquiabladz to gun to miŋe racladz
me, ni scagaa me racnien to rrielo run tow.

¹⁴ Ni ncuaane rieguial to gun to, inę nguieel
golgac golguna, peet glisquide to, ni niicle
tildiidzdgaa to; ¹⁵ zeeŋa tsod pe nacne cho glisqui
guiab zho laa to pe falt, pe dol ne quiayun. Gollu
ganle nli xpëedle Dios nac to; zaacse golban, niicle
ne ladaque grë miech ntseeb, miech ncow ne
ndxie lo guidzliu rii no to. Golgac zig tib biini lo
zho, zigne rziini mel gbaa lo ncow ne nac guieel.

16 Ib csaande to Xtiidz Ndzon Jesús, diidz ne rdeed guielmban, lëew golconie guic to. Sca golgac, zeeña gal dze ne laa Jesús guiaad stib, per nli gley naa gañ naa led zhliëd brie naa bial naa, bialseed naa to. **17** Zig nac niina, tel niaca miñe no gded naa xquielmban naa gaca zig tib gon, parne dib zdooraa to gliladz to Dios, haxta zley naa gded naa xquielmban naa; sac racladz naa ye to ygaaguielbley. **18** ¡Golley sca! Zigne no guielbley rii zdoo naa, scaquegaa to golco nley zdoo to, zeeña grë ne gley.

Timoté ni Epafrodit

19 Telne gneedz men ndzon ne rnabey ne diidz, racladz naa cxeelniob naa Timoté guiaadwi dien zha no to, zeeña haxta stibgac zdoo naa zeeñ laa Timoté glansonie diidz lo naa. **20** Me cxel naa, sac Guiend stib zha ne zienie guic zig zienie guic naa, tel led med; sac tel me nonie to guic me. **21** Grëraa zho, ncuaañe yquiin lo zho rioxco zho, laa ne tsoxco zho miñe nac xtsiin Jesús. **22** Laa Timoté, led nanle to ganle zha ndzinli nac me, tel niina iñe tib mëed nac me lo naa, nroob yudar ne quiayun me noseed no miech Xtiidz Ndzon Jesús. **23** Ible laa guic naa no cxel naa me lo to i, loxaque gacnañse naa dien zha csañ wxtis rii xcuent naa nu. **24** Ni ye naa nend prontaque guialso naa i dien yo to, sac rieñ naa ible zneedz Dios diidz guial naa.

25-26 Ni rgobey naa nonguielaquew cxel naa bets ne Epafrodit guiaad me nëz qui, sac laa me rbanle to, ni no me zhgab bin me laa to gocnañ ne laa me bzhaacnë. Nli laa to pxeel me lo naa nu, ni blactagaa noyuñ me xyudar naa ne znu mban

nodeed naa, blactaa noyacnie me naa lo dziin ne nodziuun no. ²⁷ Ni nligaa bzhaacnë me, nzhoō goc me zootle laa me nietle; per pquia zdoo Dios me ni pquiaagaa zdoo Dios naa peet good me, sac gon̄ nole naa guielnë, ni tel̄ pe niacaque me mazdraa niac nroob xquielnë naa. ²⁸ Miñ co nagon̄ laa naa cxelgazh me, zeena gley to gan̄ to lo me stib, ni scagaa niicle naaw zley naa. ²⁹ Golley sca gon̄ golcaania me, golguien̄ ganle bets to nac me, bets new grë ne ne nac ne zha ne ngab lo Dios; ni grëragaa zha ne nac zig nac me, golleynie zho. ³⁰ Golgan̄ ganle, tel̄ me haxta bdedlaa me niet me nu niina ne biaadgun̄ me xtsiin̄ Jesús; per ib pquiad zdoo me me, bleeladz me xquielmban̄ me biaadgun̄ me xyudar naa, porne brieelod niaadzhal to.

3

Ncuaane mazdraa non

¹ Bets, bzian, golley ne laa to ngab lo Jesús men̄ ndzon ne rnabey. Miñe ziesole naa diidz lo to, guieete naa zneque naaw stib, sac ncuaane yquingaa lo tow: ² jib cxende to lo grë mëcw dox qui! Grë miech ndzinlid ne squi quianzë, racladz zho tsopaa zha bgui bey, sac rzac zho zha ne sca tso bey, ga rlu xnëzle Dios no zho. ³ Sangue ne, ndionqle ne zha nac diidzli, zha ne rleynie Dios zigne rsiaab Espíritu Sant guic zho, ni dib zdoo zho ruñ zhow, zha co nac zha ne nlipaa no xnëz me. Ne ne nac ne zha ne no xnëz me, Jesús nac men̄ ne rdziuun̄non ne, sac ndion̄ ne por me laa Dios ycaania ne; rnalod ne grë ncuaane laglaase, ⁴ sac tel̄ne scaw; zig nac naa pe zhista ncuaane dzigo zrielo gnalo

naa. Tel no zha ne rzac por ncuaañe been zho miñ co laa Dios csilaa zho; tel scaw, nroobraa ncuaañe ziyuñ naa lo zho: ⁵ Xon ngbidz raap naa laa naa biole bey co, zha Israel nac naa, lo xtii Benjamín zial naa, merpaa zha Israel nac naa; sac niicle pxoz naaw, niicle xniaa naaw zha Israel nac me. Niicle xleygaa zha Israela, nroob pseed naaw, zha farisé goc naa; ⁶ bleyniedox naa grë miñe zienal zha Israel, gacxe waa pquianal naa grë miech ne no xnëz Jesús; zig nac miñe raquiet lo ley, grësew ben naaw zigne naca, ib biod dze ne cho zha pe nlisqui lo naa.

⁷ Lëë grë ncuaañ co rnalo naa len dze co, sangue niina Jesús rnalo naa, grëse ncuaañ co laaw psanle naa tib lad. ⁸ Ni led loxaque psandse naaw tiblad, sinque grësew peet nondraaw lo naa, miñe non lo naa niina nacne beenbey naa cho nac Jesús, men ndzon ne rnabey naa. Niina ne laa naa runbey me, grëse ncuaañ co rzaac naaw zig rzac ne grë pe guizh beed, sac laa naa racladz gbigraa naa lo me, ni gacniera naa me. ⁹ Zanaldraa naa gun naa miñe rnabey ley par guiaanmbé naa lo dol, sinque laa naa zanal dib zdoo naa gliladz naa cho nac Jesús; sac zha ne dib zdoo rnalo me, sañmbe Dios zho lo dol. ¹⁰ Racladz naa guienraa naa zha nac Jesús, ni gaap naa poder ne pquin Dios zeeñe blische me me len baa, ye naa teed grë miñe bded me, ni cueeladz naa xquielmban naa zigne bleeladz me xquielmban me; ¹¹ ni scagaa, nañpaa naa ye naa grieeban gal dze ne guiadbeeban me grë zha ne no xnëz me.

Stsëë Jesús xcuerp zha ne ngab lo me

¹² Gnid naa togo laa naa beŋle gan, nasi laa naa nacle zigne racladz Jesúś gac naa; led scada, laa naa bii noxcow, sac naŋpaa naa zac naa zigne no guic me gac naa zeeŋe psilaa me naa. ¹³ Bets, bzian, gard gun naa gan; per xco co no naa; grëse ncuaane bded laaw biaaŋladzle naa, laa guic naa zienie ncuaane naraa ziaad. ¹⁴ Masaque rzaac naa niina zig rzac zha ne rie prueb lo corr, rded naa fuerz gdziŋ naa zaatne gneedz Dios zhípremio naa, guielŋzaac ne rbedz Dios ne ygaa ne zeeŋe laa ne rliladz Jesúś.

¹⁵ Ni ib znu none tsonie guic grë zha ne nlipaa dziits zo lo Xtiidz Dios; telne nogaa bla zha ne rzac led scada, per Dios gdeed guielbiini lo zho guien zho ganle zha naca. ¹⁶ Ni negaa, grë mine rieŋle ne zha nac, none gban new.

¹⁷ Bets, bzian, golwi ganle zha mban naa, ni zha mbangaa grë zha ne zienal miŋe blu no lo to grë to; dzigo sca golban. ¹⁸ Sac gon nzian zha ne nacgrë to i (blactaale zizet naa zho lo to, ni niina haxta roon naa rzet naa zho stib), laa zho mban zigne racladztaa zho, rlëē zho ron zho pe nac gut Jesúś lo cruz; ¹⁹ ni nëz ne nitlo zho ga zie zho. Laa ne tsienal zho miŋe rnabey Dios, laa zho zienal grë ncuaane gdeed guxt zdoo zho, ncuaane gdeed guxt xcuerp zho. Loxaque grë ncuaane mbee guielto zienal zho, per zha rlozhd gleynie zhòw; niapse grë ncuaan lo guidzliu rii nonie guic zho. ²⁰ Saŋgue ne, laa ne zional ncuaane ygaa ne gbaa, sac gbaa nac zaatne ngab ne, ni laa ne quiambiaaz guiet Jesúś gbaa guiaad me stib (me nac meŋ ne psilaa miech lo dol, me nac meŋ ndzon ne rnabey); ²¹ zeeŋa ctsëe me xcuerp beŋ wiich ne nu, gaca zig

nac xcuerp ndzon me. Ni ib zun mew, sac nroob poder ne rap me rnabey me grëtaa ncuaane no.

4

Rnab Pabl nley gac zha Filip

¹ Bets, bzian, ne nlipaa gon rleynie naa to, haxta rzaac naa tebaa laa naa ranle lo to; to nac xquielbley naa, to nac zig tib premio lo naa por grëtaa xtsiin Jesús miñe ben naa lo to. Laa naa rso diidz lo to, tibaque squi dziits golso, ib csaande to zhiwseed Jesús.

² Rnab naa lo bzian ne Evodia, ni lo bzian ne Sintique glëelsadraa zho, none tipse gnee zho; sac gon bel zho, xnëz Dios no zho grop zho. ³ Ni luu gon bets, ne nac luu zha ne tibaque quiayacnie naa lo dziin ne quiadziuuñ ne, laa naa rnab lo luu bnee lo grop wnaa qui gneewen zho stib, sac gon ye zho blactaa miñe bded zho zeeñe bzënal zho zhits naa biotiiz no Xtiidz Jesús, ni zeeñe güeynalgaazho zhits Clement, ni zla zha ne rdziungza no dziin. Laa lë zho zhooble len libr ne quia lë grëse miech ne bgaale guielmban ne gdziñdraa dze lozh.

⁴ ¡Golley sca, tibaque golley! ¡Golgan ganle lo Jesús ngab to! Ni rneque naaw stib: ¡Golley! ⁵ Golguien zaacse golbannie grëse samiech to, zeeña haxta gzëeb diidz ganle ne nli miech ndzinli, miech ndooladz nac to. ¡Golguien ganle, ile ziaad men ndzon ne rnabey ne!

⁶ Tel pe nac grë ncuaane quiaded to, tsode to zhab, gdziebde to, sinque golzodiidznie Dios, golsan grësew ladznia me; per led loxaque gnabdse to, sinque golsoladz goldeed xquizh lo me. ⁷ Ni

zeene sca csañ to grë xliaadz to ladznia me, haxta tibliladz guiaan̄ zdoo to, peet dzeb tsoniedraa zdoo to, peet zhgab tsoniedraa guic to, masaque Jesús nac meñ ne nacnie to; grëraa miech ib guien̄d zho zha nac ne scataa tibliladz rac to.

⁸ Bets, bzian, nu ne laa naa csiaalle guits rii laa naa rnab lo to, miñ rii golconie guic to:
 niapse miñe nac diidzli,
 niapse grë ncuaane nonguiel gac,
 niapse grë ncuaane rac zigne nac diidzli,
 niapse grë ncuaane mbe,
 niapse grë ncuaane gleynie miech,
 niapse grë ncuaane gley miech gon zho,
 niapse grë ncuaane yquiin,
 niapse grë ncuaane gzee zdoo miech ni gleynie
 zho.

Grë miñ rii golconie guic to, ni lëew goltsoxco gun̄ to.

⁹ Ni golguien̄ gon̄, grë miñe pseed naa to, miñe psañ naa diidz lo to gun̄ to, grë miñe bin to bne naa lo to, miñe gon̄ to ben̄ naa, grë miñ co goltsenal; zeena scagaa zacnie Dios to ib peet zhgab ctsebdraa to.

Gon ne bdeed zha Filip

¹⁰ Ne nlipaa rded naa xquizh lo men̄ ndzon ne rnabey ne, ni rley naa ne laa to pxeel grë ncuaane yquiin naa stib. Nañ naa ne led biaanladzde to naa, sac tibaque noxco to dien̄ zha gun̄ to xyudar naa; sinque bdeedniobda diidz. ¹¹ Rley naa ne laa to psoladz naa, maase niicle nodpaa naa zhgab co dien̄ pa grieë pe yquiin naa, sac pseedle naa peet zienied guic naa niicle tel̄ zhataa nodeed naa. ¹² Nañ naa zha nac guielprob, ni nañquega naa zha

nac zeeñe quianie ne nroob ncuaañe yquiin ne. Pseedle naa rzac zdoo naa miñe nodeedtaa naa, niicle zeeñe biódzé zdoo naaw, zeeñe rcaabedz-gaa naaw; niicle zeeñe nroob ncuaañe yquiin naa no, zeeñe peet guien̄gaa. ¹³ ¡Grësew rrieelo naa, sacne nacnie Jesús naa, me rnneedz xfuers naa! ¹⁴ Per wen ga been̄ to, pxeel̄ to ncuaañe pquiin naa lëétaque len̄ dze ne peet guien̄d lo naa.

¹⁵ Zeeñe brie naa nëz xtan zha Macedon i, len̄ dze ne wriiñ psilo noseed naa miech Xtiidz Ndzon Jesús ga, tosaque nac zha ne been̄ xyudar naa, been̄lo to gon pxeel̄ to lo naa, porne rleyne to dziin rii. ¹⁶ Scasaque len̄ dze ne no naa Tesalónica, blalaa vuelt pxeel̄ to pe pquiin naa.

¹⁷ Guiabde to togo bod ne dien̄ zha ygadraa miech lo naa gane rzetpaa naaw; lëda, sinque rley naa ne squi rala zdoo to rgad to, sac squi nroobraa guiel̄nzaac ne ycaa to. ¹⁸ Tel na gon̄, grële ncuaañe yquiin naa no, haxta nrooblew nu. Ni ne pxeelaque to Epafrodit biaadsan̄ stib nëza, haxta bdedsole goclow lo naa nu. Grëtaa ncuaañe bgad to lo naa, rrieequia naca zig tib gon ne bdeed to lo Dios, zig tib gox ndzon ne sac zdoo me ycaania me. ¹⁹ Scagaa niina nagon̄, grëse ncuaañe yquiintaa to, Dios men̄ ndzon ne rliladz ne, me gneedza lo to, porne nligaa dib zdoo to rliladz to Jesús; sac gon̄, nroobdoo grë guiel̄ndzon, grë guiel̄nzaac ne rap Dios. ²⁰ ¡Lëe xdios ne ga, me nac Pxoz ne grëse ne! ¡Gotsaa dziuun̄non ne me sca, mesi gdziñd dze ne nitlo xquiel̄ndzon me! Sca rieguiala.

²¹ Goldeed tib zhibdiuzh naa lo grëse zha ne no xnëz Jesús i, grë zha ne squi noxco mban zigne racladz Dios. Scagaa golcaania zhibdiuzh grë zha

bets ne, zha ne no lo naa nu. ²²Golcaania zhibdiuzh grëse zha ne no nu, zha ne rliladz Jesús; haxta ye grë zha ne rquia dziin lo rey Roma nu, laa zho rxeel zhibdiuzh zho lo to.

²³Jesús, meñ ndzon ne rnabey ne; me noxco to, me nonie grë zhizhgab to. ¡Me gunlay to grëse to!

Pabl

**Diidz ne rdeed guielmban
New Testament in Zapotec, Mixtepec
(MX:zpm:Zapotec, Mixtepec)**

copyright © 1998 Wycliffe Bible Translators, Inc.

Language: Mixtepec Zapotec (Zapotec, Mixtepec)

Translation by: Wycliffe Bible Translators, Inc.

Zapoteco, Mixtepec [zpm], Mexico

Copyright Information

© 1998, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mixtepec

© 1998, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 11 Nov 2022 from source files
dated 29 Jan 2022

5317ca58-7555-5e4c-a420-e1e9210e2df2